

**Jemsini Pipia Topa Tirimu
Ungumu
Jems**
**I Ungu Torumumunga Ungu
Pulu Mare**

Jemsini Jisas ipuki tiko Jerusalem moloringi im-bomanga tapu iye awili molorumu. Imbomani toya toli uluma teangei nimbe umbuni menge wali eno tepa enge tipili nimbe i pipiamu topa mundurumu.

Goteni nu yunge lipa manjili peli imbomu molkolio uluma pali toya toko teani nimbe enge tipili.

*Jemsini pipia tombaindo pulu polopa torumu
ungumu*

¹ Na Jems, Gote kinye Awili Jisas Kraist talonga kongono tendeli kendemande iye te, nani i pipiamu topo, Israel imbo talape ki yupokonga imbo konoko pungo kombu Judia distrik tawendo kombu lupe lupemanga moromele imboma topo tiro. Eno molko kondaio!

Umbuni wendo oromomani lino enge tirimo

²⁻³ Nanga ango kame, enonga ipuki tirimelemu enge nimonje nimbe manda manjipe karomo umbunimani enonga konopuma tepa enge tirimo ningi pimele kani eno tepa manye mundumbei tembalo umbuni lupe lupema eno moromelena wendo ombalo wali paimbo wendo oromo ningi

paa tono kolongei. ⁴ Eno molko kondoko, waliwali-ma enge ningi umbunima meangei konopu enge nili uluma eno kinye enge nimbe pepili kani kamukumu imbo konopu pepili Gotenga imbo yuma molko, Goteni kanopa penga pimo ulu penga te konopundo naa ponjipili molangei.

Imbo tengai lipe manjilimu manda naa pemo lemo yu Gote konge tepili

⁵ Imbo te yunge lipe manjili ponjimo lemo Gote kinye konge tepalie lipe manjili te tiwi nimbelo wali melema konge teremele wali iri naa topa mele awini toya topa tirimo Goteni paimbo timbelo. ⁶ Nalo konopu talo tepe kimbo tirimo imbomu, poporomeni unjo mumu mepa andoromo mele, yunge konopumu aku ulu teremo kani timbelonje naa timbelonje, lipe tapondombalonje naa tapondombalonje nimbe konopu talo tepe naa kimbo tipelie aku imbomu konge tembo mele paimbo timbelo nimbe ipuki tipelie konge tepili. ⁷⁻⁸ Imbo te aku tepe konopu talo tepe peremo imbomu yu konopu talo tepe peremomunga yunge konopumu beambo nimbe, konopu tendekure kau naa pepa Awilimuni na melte timbelo konopu naa liepili.

Iye koropa nolima kinye iye kamakomanga ungumu

⁹ Eno Kraistinga imbomanga angenu te melema naa noipe koropa nomba mai kombuna imbi naa moromo imbomu Goteni yu kinye ulu penga te tepe, Gote kinye imbi ltemo nimo kani tono kolopili. ¹⁰ Nalo kondipe tindi te enge naa nimbe

nondopa oo ltemo mele imbomaaku teko kamukumu naa molko nondoko koromele kani lipe manjipelie Kraistinga imbo kamakomu Goteni yu imbi naa molopa we imbo mele molopili nimo kani tono kolopili. ¹¹ Ena enge nimbe toromo kinye era melema topa kondoromo wali kondipe tindi penga toromoma kolopa oo lepa mainye purumo. Aku tepala imbo te mele awini noirimimbomu kou limbei kongonomu tepe molopalie akuna kolombalo.

Goteni lino kinye ulu pengama kau tepe, ulu kerima teangei nimbe tope naa tirimo ungumu

¹² Imbo te umbuni lupe lupema wendo oromo kinye aku umbunima mepa enge nimbe moromo imbo akumu umbuni wendo oromomani yu tepe mainye naa mundurumomunga Goteni waliwalima koinjo molopa kondopa kau puli ulu pulumu timbelo, akumu yunge mele pengamu limbelo kani umbuni lupe lupema wendo ombalo wali aku umbunima paimbo na kinye wendo oromo nimbe konopu tipili. Aku mele pengamu koro oi Goteni Yu paa konopu mondonge imboma mele aku tepe timbo nimbe, nimbe panjirimu mele pengamu.

¹³ Ulu pulu kerimuni Gotendo ulu pulu keri te tewi manda naa nimbelo. Goteni imbo tendo ulu pulu keri te tewi paa manda naa nimbelo. Aku lemo ulu teni imbo te ulu pulu keri te tewi nimbe ulu te manda manjipe kanombalo wali aku imbomuni Goteni na tepo kenjembo nimbe konditoromo ungu naa nipili. ¹⁴ Linonga konopumuni aku ulu pulu kerima teamili nimbe konditoromo

wali linonga konopu keri akumuni ulu pulu kerima teamili nimbe lino tope tirimo. ¹⁵ Aku wali ambo te bakulu olo mongo toromo mele konopumuni aie konopu lepalie ulu pulu keri te peremo. Aku tepalie ulu pulu kerimu akopa pora tipelie kololi ulu pulumu wendo oromo.

Goteni mele pengama kau tirimo ungumu

¹⁶ Nanga paa konopu mondoro ango kame, enonga konopuni paimbo nio ningko kolo toko konopu leko naa kenjeio. ¹⁷ Mele pengama kinye ulu pengama kinye, aku tepe ulu paa pengama pali yando we naa limolo. Aku melema mulu kombuna wendo oromo. Muluna ola pa tendepa angimo melema tepe panjirimu Lapamuni kano mele paa pengama tirimo. Unjo kinye mele-manga minima tule lepala ponjirimo mele Gote aku tepe alowa malowa naa teremo. ¹⁸ Aku iye-muni lino yunge bakuluma molangei meambo nimbeline yunge ungumu, lino lipe tapondopa im-boma koinjo molonge engemu peremo ungu paa paimbomuni lino mepili nimu. Yunge imboma yuni lino we imboma kinye melema terumanga pali kiyendo molangei nimbe lino aku tepe wamoramu.

Gotenga ungumu pilkolio lombieio ungumu

¹⁹⁻²⁰ Paa nanga ango kame, i ungu pileio! Goteni imboma tumbi tiko molonge kinye paa konopu lepa karomo mele imbomanga mumindili kololi ulu akumuni aku teko molangei nimbe naa lipe tapondoromo kani imbo teni ungu te nimbelo kinye wamongo pilemili ningko komu tendeko molko, ungu te nondoko pundu toko naa ningko,

mumindili naa kolaio. ²¹ Mumindili kololi ulumuni eno naa tapopili akumunga ulu kalaro mololima kinye ulu kerima kinye teremelema pali na kinye naa molopili ningi tiye kolko, Goteni ungu oi enonga konopumanga panjindirimu, aku ungumuni eno mini pali lipe tapondopa mindili nolemala aulkena manda wendo lipe Gote kinye peya molko kondonge aulkena manda lipe mondombalo akumu tako liko pilko molangei.

²² Gotenga ungumuni nimo mele we komuni kau naa pileio! Pilkolio tenge tiko teaio. We komuni kau pilkolio nimo mele teremele lemo eno enongano kolo toko paa tepo moromolo konopu ltemele. ²³⁻²⁴ Aku teangei niomunga ungu pulu te i tepa mele: Imbo teni ungumu we komuni kau pilipelie, nimo mele pilipe lipe naa temo lemo yu imbo teni yunge kumbekeremu kariapana kanopalie wendo pumbelie yunge kumbekere ambe telimunje nimbe naa lipe manjirimo aku mele. ²⁵ Nalo imbo teni, ulu pulu kerimani lino ambolopa ka kongono tirimo aulkena mindili naa nongo we molangei nimbe wendo ltindirimo ungu mane pengamu wamba kanopa tiye naa kolopa molopa, nimo mele komu naa tindi pe pilipe lipe tepa molomo lemoaku imbomuni ulu teremomunga Goteni yu molopa kondopili nimbelo.

²⁶ Imbo teni na Gotenga ungumu paa pilipo lipo yu kapi nimbo ungu manema paa pilipo moro nimbe pilipe moromo nalo yunge ungumu nokopa naa kondomo lemo yuni yunu kolo topa konopuni kau paa aku ulu tero nimbe pilipe, yunge konopumu lepa kenjirimo. Yu Gotenga

ungumu pilipo lipo, yu kapi nimbo ungu manema paa pilipo moro nimo ulu akumuni yu lipe tapon-dombalo ulure naa teremo. ²⁷ Linoni Gotenga imboma molopo yu kapi nemili nimolo imbo-mani linonga Lapa Goteni ulu kake tepe kalaro naa moromo nimbe karomo uluma temolo mele i tepe: Anupili lapali koromele bakulu kolum-luma kinye, ambo waima kinye, mindili nongo umbunima wendo opili moromelema aku teko naa molangei ningokoko, maina imbomani ulu pulu kerima teremele mele naa tengen. Aku ulu pulu kerimani lino ulu te naa tepe, lino kalaro te naa mondopili ningokoko molko kondoromele.

2

Linoni imboma moke naa tepo wayema kondo kolopo lipo tapamili

¹ Nanga ango kame, eno linonga iye awili Jisas Kraist iye paa penga imbi olandopa molopa enge peremo paimbo ningokoko ipuki tirimelemani imboma moke teko imbo te imbi olando mololimu tapoko, imbo te imbi naa mololimu naa tapoko, aku ulu naa teao. ² Iye te wale pakoli paa pengama pakopa, kou goloni teli ring ki mongona mondombalo iye te kinye, iye koropa te wale pakoli kerima pakombalo iye te kinye, aku iye talo eno nombeya teko molongena ongele wali kanokolio ³ iye wale pakoli pengama pakombalo iyemu kanoko penga pilkolio paa nokoko i polo pengana ongo molowi ningokoko, iye koropamu kanoko keri pilkolio yundo neya kulendo pungo ola angiliwi molo nanga kimbo mundurona ongo mainye molowi naa neio. ⁴ Aku teko ninge

lemo eno konopu keri pepili eno enongano nendo yando moke teko kenjirimele. Eno aku teko im-boma moke teremele mele enongano konopuni pilkolio i imbomuni na manda tapombalo, imuni na naa tapombalo nimbo kanopo moke tepo ken-jirimolo ltemo ningko liko naa manjirimeleya?

⁵ Paa nanga ango kame, pileio! Goteni imbo mare nanga imboma molangei nimbe kanopa limbeindo ya mai kombuna imbomani kanoko imbo koropa pupili moromele ningko karomele imbo akuma Goteni kanopa lipelie imbo kamako mele molangei nimbe enondo nimbeindo, enoni yu paimbo ningko ipuki tiko kondokolio imbo na konopu mondonge imboma nani iye nomi kingimu molopo nokoro kombuna na kinye peya molamili nimbo panjiru akumu eno peya aku tepo molamili wangei nimu. ⁶ Nalo nanga ango kame, enoni imbo koropama pipili kolangei ningko teko kenjirimele. Ango kame, imbo naimeleni eno kondi toko enonga melema liko, mindili tiko, kot tendamili waio ningko teremele imbo akuma naimeleya? Iye koropamani aku teremeleya? Molo! Iye kamakomani eno kinye aku ulu teremele. ⁷ Eno Jisas Kraistingu imboma moromele aku iyemunga imbi pengamu naimeleni ungu tako tondoromeleya? Iye koropamani aku teremeleya? Molo! Iye kamakomani aku ulu teremele.

⁸ Gotenga bukuna ungu mane te tirimu paa olandopa moromo aku ungu manemu pilko liko tengen tiko tengen lemo paa. Aku ungu manemuni nimbei, enongano yu mele mele konopu mon-doko, enonga kangima enongano kondo kolko

nokoromele mele aku tekola imbo wema konopu mondoko nokoko molangei nimbe moromo ungu mane akumu pilko liko teao. ⁹ Nalo imboma kanoko moke tekolio yu penga, lipo tapondambo; yu keri, naa lipo tapondambo ninge lemo ulu pulu keri te teremele. Akumunga Gotenga ungu manemani nu ungu mane naa lombili iye kerire morono ltemo nimbe lipe ondombalo. ¹⁰⁻¹¹ Aku niomunga pulumu i tepa: Lino pimolo, ambo iye puli te molo iye ambo lili te imbo te lupe kinye wapu ulu kerinali naa teangili nimbe nimu Iyemuni imbo te toko naa kondangei nimu kala. Aku lemo nu wapu ulu kerinali naa tekolio imbo te toko kondonio lemo ungu manema topa tangondoli imbomu morono. Akumunga imbo te ungu manema pali pilipe lipe teremo nalo tendekure kau topa tangondomo lemo aku ulu teremomunga ungu manema pali topa tangondromo.

¹² Ulu te tengeindo molo ungu te ningeindo oi i teko ningi pilengei. Ulu pulu kerimani lino ambolopa ka kongono tirimo aulkena mindili naa nongo we molangei nimbe wendo ltimu ungu mane pengamuni nimo mele pilipelie Goteni lino uluma tepo unguma nimbo teremolo mele pilipe moke tembalo kani, pilkolio aku ungu manemu pilko uluma teko unguma ningi teko moromele mele pilko teko kondangei. ¹³ Imbo teni imbo te kondo naa kolomo lemo altopa Goteni kot pilipelie yu kape kondo naa kolombalola. Imbo teni imbo te kondo kolombalo imbomu Goteni yunge kot pilipelie yu kape kondo kolombalo.

Ipuki tili ulu pengama naa teremele akumu we

ipuki tirimele

¹⁴ Nanga ango kame, imbo teni na Gote ipuki tiro nimo nalo ulu pengama na teremo lemo yuni ipuki tirimo ulumuni yu lipe tapondoromoya? Yuni ipuki tirimo ulumuni yu mindili nolka aulkena wendo lipe Gote kinye molopa kondombalo aulkena manda lipe mondombaloya? Ulu pengama naa temo lemo paa manda molo.

¹⁵ Angena kape kemilie kape, te wale pakoli keri te pakopa, langi nombalo te naa lembalo wali, ¹⁶ enonga imbo teni yu langi kinye wale pakoli mare naa tipelie yundo nimbeindo, nu konopu u nipili pungo, ali naa tepili wale pakoli penga te pakoko, olo tembalo langi mare nopuwi nimo lemo aku tepa nimbelomuni yu paimbo lipe tapondombaloya? Ulure manda naa tembalo.

¹⁷ Imbo teni imbo te naa lipe tapondopa ungu-muni kau manda molani puwi we nimo wali aku imbomu naa lipe tapondopa ulure naa teremo aku tepala. Imbo teni paimbo nimbe ipuki tipelie ulu pengama naa temo lemo yunge ipuki tirimo ulumu koromo.

¹⁸ Nalo imbo teni nani i nio ungumu kolo toromo nimbelie nando nimbei, “Imbo marenipaimbo ningi ipuki tirimele ulu akumu manda kala. Imbo marenipaimbo ulu pengama teko imboma likotapondoromele ulu akumu manda kala,” nimbelo. Ulu talo peya tendeku teremo. Imbo teniaku ulu talonga ulu te tiye kolopa te pilipelietembalo kinye aku ulu tendekumuni manda lipe tapondombalo nilkanje. Aku tepa nilka imbomundo nani topondopo i tepo nilka: nu Kraistini paimbo nanga nimbe tenderimu nimbo ipuki tiro

mele lipo ondambo ninggo ulu penga te naa tenio lemo nu ipuki tirino mele na ambe tepo kanomboy? Manda naa kanombo. Na ulu pengama tepo imboma lipo tapondombo ulumani paimbo nimbo ipuki tiro mele lipo ondombo. ¹⁹ Nuni Gote tendeku kau moromo ninggo ipuki tirino. Akumu paa tereno. Nalo kuromani kape aku teko ipuki tirimele. Aku teko ningolio pungu pungu ninggo mini lteremele.

²⁰ Keke lepo toli imbomu, we paimbo ninggo ipuki tiko ulu pengama naa tereno ulumuni ulure manda naa tembalo mele ungu pulumu pileni nimbo tiemboy? ²¹ Linonga ara kaue Abrahameni ulu te terimu mele kanopalie Goteni yunge ulu pulu kerima tiye kolopa, yu konopu tumbi nimbe peli iyemu nimbe imbi tirimu. Abrahameni yunge malo Aisak Gote popo topa kalopa timbeindo alta polona ola noirimuna kanopalie Goteni yu iye tumbi nilimu nimbe kanorumu. ²² Wamongo pileio! Abrahameni paimbo nimbe enge nimbe pilerimu ulumu kinye ulu terimuma kinye popo tipe terimu wali yuni terimu ulumani yunge paimbo nimbe ipuki tirimu ulumu kamukumu tepa enge tirimu. ²³ Aku tepa terimumunga Gotenga bukuna yundo ungu te nimo-munga pulumu wendo orumu. Aku ungumu i tepe: Goteni yu kinye tembo nimu mele Abrahameni paimbo tembalo nimbe ipuki tirimu-munga kanopalie Goteni yu iye tumbi nilimu nimbe kanorumu. Abrahameniaku terimumunga Goteni yundo nanga kanopa lili iyemu nimulaaku tepe moromo. ²⁴ Abraham kinye Gote kinye eloni teringili mele pilkolio, imbo teni we

paimbo nimbe ipuki tirimona kanopalie Goteni yunge ulu pulu kerima tiye kolopo, yu konopu tumbi nimbe peli imbomu nimbo karo naa nimo. Imbo te paimbo nimbe enge nimbe pilipelie ulu pengama teremona kanopalie Goteni yunge ulu pulu kerima tiye kolopo, yu konopu tumbi nimbe peli imbomu nimbo karo nimo aku mele kinye liko manjirimele.

²⁵ Aku tepala, Josuani iye talo Jeriko taunona lipe mundurumu wali imboma ambe teremelenje ningko kanoko panjingili puringili kinye ambo wapera Rahaponi elo naa tangei nimbe ya lopeke teko peangili nimbe nokopalie, altopa aulke tengalupe kelko yando pangili nimbe lipe mundurumu wali aku ulu terimumunga kanopalie Goteni yu ambo tumbi nilimu nimbe kanorumu. ²⁶ Imbo tengamiminuni kangimu tiye kolopa purumo wali kangimu koromo, aku tepa imbo teni paimbonimbe ipuki tipelie ulu pengama naa teremo wali yunge ipuki tirimo ulumu koromola.

3

Linonga unguma nokopo kondopo ungu pengama kau nemilimunga ungumu

¹ Nanga ango kame, Goteni imbomanga ulu teremelema moke tepa pilimbelo kinye lino imboma yunge unguma mane tirimolo iyemanga ulu teremoloma paa enge nimbe moke tepa pilimbelo kani enonga iye mare awinini Gotenga unguma imboma mane tiemili naa nengei. ² Aku niomunga pulumu nemboi, wali awini lino ulu penga te temolo konopu lepolio naa teremolo. Ulu keri te naa temolo konopu lepolio teremolo.

Aku tepa uluma lino imboma kinye pali wendo oromo. Imbo teni walite kape ungu keri te naa nimo lemo aku imbomu yu imbo paa pengamu, yunge kangima pali manda nokopa kondombalo.

³ Imbo teni kongi os te nanga ungumu pilipili nimbe yunge kerena ain te panjindirimo. Aku wali yuni osemu i tepa pupili, i tepa pupili nimbe ainimu lipe ka ambolopa tumbirumbi tindirimo wali osemu aku tepa topele topa purumo. ⁴ Sip teremo mele pileio! Sipima paa mele awilima nalo poporomeni kombu lupe marenga topa mundumbei teremo wali sipimanga stia paa keloma ambolkolio sip kongono teremele iyemani kombu tenga pumolo konopu lekolio stiama ambolko pupu toromele kinye pungei teremele kombu akuna purumo. ⁵ Aku tepa mele linonga keremu kangimunga mele kelomu nalo yu yunu kali nimbe yunge imbi lipe ola mundurumo. Tipe kelo teni kombu awini kuli tipe noromo mele eno pileio! ⁶ Keremu tipe melela. Linonga kangimanga pali yu mele kelomu nalo yuni ulu pulu keri awini tepalie kangima pali tepa kalaro mondopa, akumuni ungu nimolo ungumani kuli tipe noromo mele linono tepo kenjirimolo. Aku tipemu yu Goteni kuromanga nomi Satan makoropa mundurumu tipe kombuna wendo oromo tipemu.

⁷ Imbomani kongi kinye kera kinye waimbe kinye takera mele lupema kinye nomu kutana tuku moromo melema kinye aku mele lupe lupe awinima manda ari tirimele. Akuma pali liko aku melemani linonga nimolo unguma pilko teangei ningi mane tiko nokoromele, ⁸ nalo imbo teni

yunge keremu aku tepe manda naa nokoromo. Keremu yu ulu kerima tembaindo taka lipe naa moromo melemu. Imboma koromele tomoma mele linonga kerena tenepeya tepe peremo.

⁹ Keremuni linonga Ara Ola Iye kapi nimbo imbi lipo ola mundurumolo nalo Goteni yu moromo mele aku tepe terimu imboma keremuni kape molko kenjengei nimbo, nimbo kenjirimolo.

¹⁰ Gote, molo imbo te kapi nimbe imbi lipe ola mundurumo ungu pengama kinye nimbe kenjirimo ungu kerima kinye kere tendekuna waye talo wendo oromo. Nanga ango kame, ulu aku tepamu eno kinye naa pepili nio. ¹¹ Aku tepe mele maina no tendeku akupe wendo oromona api nomu kinye imbo nomu kinye tendekuna wendo naa orombele. ¹² Nanga ango kame, unjo fik teni unjo oliv mongo manda tombaloya? Molo, unjo wain teni unjo fik mongo manda tombaloya? Aku tepe, no kombili teli tenga no tingo teli te manda wendo naa ombalo.

Lipe manjili pengamu kinye lipe manjili kerimu talonga ungumu

¹³ Enonga imbo te unguma wamba pilipe, imbonanga uluma pilipe kondopa, lipe manjili peremoya? Aku ulu teremo imbo te molomo lemo imbonani yu paimbo aku tepe imbonu moromo mele ninga kanangei nimbe yunge aulke andopa ulu tembaloma paa penga liepili. Yu kalambo naa nimbe yunge imbi lipe ola naa mundupe, konopuni pilipe kondopa, lipe manjili peremo ulu pengama kau tepili. Aku tembalo wali imbonani kanokolio yu paimbo lipe manjili peli im-

bomu moromo ningko kanonge. ¹⁴ Nalo enonga konopuna imboma kinye yokoli kolko imbo nomi kelkele toromele konopu mandopa peremo wali enongano maluwele naa taio. Ulu tukumemu we mele none naa tendaio. ¹⁵ Aku tepa lipe manjilimu mulu kombuna wendo naa oromo. I mai kombuna kau wendo oromo. Oi konopu kerimanga Gotenga Minimu naa molorumuna perimu aku konopumanga wendo oromo. Aku tepa ulu wendo oromomanga lapamu Satan yu. ¹⁶ Pileio! Enonga konopuna imboma kinye yokoli kolko imbo nomi kelkele toromele konopu mandopa peremo wali waimu naa koromo kinye imbo mareni ulu pulu keri i kano kanoma teremele.

¹⁷ Nalo mulu kombuna wendo oromo lipe manjili akumu lupe. Goteni lipe manjilimu imboma tirimo wali aku imbomani i ulu teremele: Kumbe lepa ulu kake telima teremele. Ulu mare i tepala: imboma mindili naa tiko eno kinye konopu tendekuna pupili taka liko molko, imboma kinye kandiki tepili molko, enonga nokoli iyemani ungu nimelema tenge tiko, imbo mare umbuni peremoma kondo kolko liko tapondoko, we imbo koropama molo kamakoma naa apuruko imboma kinye pali aku ulu teko kondoko, topele mapele naa toko temolo nimele uluma paa teremele. ¹⁸ Imboma konopu tendekuna pupili ningko uluma teremele imbomani poinyena langi imbo mele panjirimele. Konopu tendekuna pupili uluma poinyena panjirimele wali imboma tumbi ningko molko ulu pengama tenge uluma poinyena mongo tombalo.

4

*Maina ulu konopu mondoromele imboma Gote
kinye opa pule toromele*

¹ Eno irinale teko opa teko teremele akumu pulu ambe tepochengaku teremeleya? Enonga konopumanga melema liemili ning uluma teamili konopu ltemele ulu akumani enonga konopuna tukundo opa pule topa teremomunga enoni konopu talo yupoko pepili aku teko teremele. ² Melte kanokolio konopu mondoko liemili konopu ltemele nalo naa ltimele. Naa likolio pulu imboma toko kondoromele. Imbo teng melema kanoko aie konopu ltemele nalo aku melema linge aulke te naa ltemomunga paa mumindili kolko enge ning irinale teko opa teremele. Eno Goteni melema tipili ningyu kinye ungu ning melema konge naa teremelemunga liemili nimele melema naa ltimele. ³ Melema liemili ning Gote konge teremele akuma liemili nimele mele eno enonganokonopu tipo manda molamili ning konge teremelemunga Goteni enonga konopuma kanopalie naa tirimo.

⁴ Ambo teni yunge iyemu tiye kolopa wapera andopa toromo mele eno Gote tiye kolko melema konopu mondoromele imboma, mai kombuna uluma kinye melema pulu ltemo ning kopu teko moromele imboma aku teko moromelemunga Gote kinye opa pule toko moromele, akumu eno naa pimeleya? Mai kombuna melema kinye uluma kinye konopu mondoko lino kinye pulu liepili kopu tepo molamili nimele imbomani aku teko nimelemunga Gote kinye opa pule toromele.

⁵ Molo Gotenga bukuna moromo ungumuni nimbeindo, lino imbomanga minima Goteni trimumani Yunge unguma kau pilko, yunge kongonoma kau teko molangei nimbe moromo aku ungumu we nimo konopu ltemeleya? ⁶ Nalo Goteni lino olandopa kondo kolopalie lipe tapondoromo. Aku tepa teremomunga ungu te Gotenga bukuna nimbe moromo. Akumu i tepa:

Imbo te yunu iye nomi kelkele toromomu Goteni yunge imbimu tepa mainye mundupe naa lipe tapondoromo.

Nalo imbo te yunge imbimu tepa mainye mundurumomu Goteni we kondo kolopa lipe tapondoromo. *(Snd 3:34)*

⁷ Akumunga Gote liko awili tiko yunge unguma pilko molaio. Kondi toromo Sataneni ungu nimbeloma paa naa pilko enge ning umbulu tieio. Aku tengen wali eno tiye kolopa kowa pumbelo.

⁸ Gote kinye kopu tepo molamili ningyu moromona nondoko wangei. Nondoko onge wali eno kinye kopu tepo molamili nimbe yu eno molongena nondopa ombalo. Eno ulu pulu keri teremele imbomani Gote moromona nondopo pamili ningolio imbo tengen ki kalaro moromo wali kulumie toromo mele enonga konopuna enongano pimele uluma kulumie taio. Eno imbo konopu talo peremo imbomani konopuma kake tepili. We melema konopu kimbo tipo moromolo mele mainye pupili neio. ⁹ Eno ulu teremelema kanoko keri pilko, konopu umbuni tepa kamele mindili tepili kola awini teko molangei. Owe teko pende pende teremele ulumu tiye kolko konopu keri panjiko pinyewe kikime kola teaio. Paa tono

kolko moromele ulumu tiye kolko konopu paa umbuni pepili molangei. ¹⁰ Awilimunga kumbekerena yu iye awilimu, linonga imbima mainye molopili ningotaka liko molangei. Aku tengewali yuni enonga imbima lipe ola mundumbelo.

Nendo yando imbomanga ungu umbulkondo naa nindemili ungumu

¹¹ Ango kame, nendo yando enonga angeinali marenga ungu umbulkondo naa nindengei. Imbo teniyunge angenu tenga ungu umbulkondo nindipe, tepe kenjirimo imbo kerimu nimo imbomuni Gotenga ungu manemanga kape ungu umbulkondo nindipe, aku ungu kerimu nimo. Ungu manema moke tepe ungu kerimu nimo imbomu ungu manema pilipe lipe naa tepe, ungu manemanga pilipe moke teli imbomu none temero. ¹² Iye tendekumu kau ungu manema tipe panjipe, uluma pilipe moke teli iyemu moromo, akumu Gote. Aku iyemu imbo mindili nolemala aulkena purumele imbo mare manda lipe tapondopa wendo lipe, imbo mare mindili nangei nimbe manda topa mainye mundumbelo iyemu. Nu ambe telka nunge pulu ltemo imbo tenga uluma pilko moke teko tepe kenjirimo ninoya?

Otili akinjo i ulumu tembo ungu naa neio

¹³ Imbo mareniningeindo, kinye molo otile kombu awili tenga pumbo bisnis tepumolo. Akuna pumbo poinye tendeku bisnis tepo kou mone awini limolo nimele imboma eno kinye ungu te peremonapileio. ¹⁴ Otili ulu te wendo ombalo wali molonge mele eno naa pimele. Enonga koinjo moromele wai akumu kupe topa

po lepa lterimu mele. ¹⁵ Akumunga neya aku teko naa ningi, i teko nengei: Awilimuni na aku teko teani nimo lemo naa kolopo koinjo molopolio i teambo nio mele paimbo tembo nengei. ¹⁶ Nalo enoni aku teko naa nimele. Eno kalambo naa ningi maluwele toko kongono awili te temolo ningi imboma ningi tirimele. Aku teremele ulumu paa ulu kerimu. ¹⁷ Akumunga imbo teni ulu penga te konopuni pilipe aku tepo tembo wali paimbo nimbe pilipelie altopa naa temo lemo aku tepa teremo ulumu ulu pulu keri te teremo.

5

Mele awini noirimele imboma wai keri wendo ombalomunga lepi lepi topa nimu ungumu

¹ Eno mele awini noirimele imboma, enondo nimboi tero ungumu pileio. Eno molongena umbuni awili mare wendo ombalo kani kola tome taio! ² Enonga mele awini noirimelema purupe lkupindi topa, enonga maminye mele pengama lkuriniani nomba, ³ enonga kou goloma kinye kou silvama kinye urelo teremo. Kouma urelo teremomunga enoni teko kenjirimele mele mona lepa, kouma urelo teremomuni enonga kangina tipe mele nombalo. Mulu mai nondopa pora nimbei tepili eno aku teko mele pulumu tukundo tukundo liko we noirimele kani kola tome taio. ⁴ Wamongo pileio! Enonga rais witima inia tondoringi kongono kendemande iyema kolo toko melema wamongo naa tiringimani enge ningi ningeindo, lino teko kenjirimele ningi alako toromele. Aku teko alako toringi mele Iye Awili paa enge olandopa pelimuni yunge komuni pilipelie enoni

kendemande iyema teko kenjiringimunga eno pundu tombalo. ⁵ Ya mai kombuna molkolio mele lupe lupe pengama konopu mondoko liemili ningi topo toko liko noiko konopu tiko molko, molko kondoringi. Eno langi paa awini nongo imbo kapo kangoma moromele nalo kinye toko kondonge waimu wendo oromo. ⁶ Ulure naa teko imbo tumbi nili moloringi imboma kot tendeko toko kondoringi. Aku imbomani eno nendo tonguei enge te naa peremo kanokolio we toko kondoringi.

*Eno molongena umbunima wendo ombalo kinye
Awilimu paimbo lipe tapombalo ningi konopu enge
pepili tiye naa kolko molangei ungumu*

⁷⁻⁸ Akumunga, ango kame, imbomani eno umbunima tirimele wali Awilimu oi naa opili we umbunima meaio. Imbo poinye teremelemani enonga poinyena langi penga te wendo ombalona lipo nomolo ningi nokoromele. Langi imbo panjikolio lo ombo ena tepa tembalo wali langi ola ombo nowi lembalo ningi taka liko nokoko moromele mele eno liko manjirimele. Eno kape, poinye teremo imbomuni langi imbo panjipelie langi wendo ombo nowi lembalo wali nombo nimbe taka lipe nokoromo mele aku teko enonga konopu toimbo topili umbunima we meko taka liko molaio. Awilimu yando ombalo walimu paa nondopa ombai teremo kani enge ningi angileio. ⁹ Ango kame, nendo yando Gotenga imbomani ulu teremelemunga umbunima wendo wendo oromo ningi iri karaye teko ungu umbulkondo nindiko naa teangei. Gotenga kotena naa angilemili ningi

aku ulu naa teangei. Kot Pilimbelo Iyemu nondopa oromo.

¹⁰ Ango kame, profet iyemani Awilimunga ungu nimbe mundulima ningi tiringimunga opa pule imbomani eno teko kenjiringi wali enge ningi umbunima taka liko meringi mele pilkolio aku teringi ulu manda leko teaio. ¹¹ Pileio! Imbo konopu enge pepili umbunima we meko paimbo ningi ipuki tirimele mele tiye naa koromele imboma eno malo nimbo pimolo. Oi molorumu iye Jop enge nimbe, yu kinye umbuni wendo orumuma we mepa molorumu wali altopa Awilimuni yu kamukumu molopa kondopili nimbe ulu mare terimu mele temanemu eno pimelela. Lino pimolo, Awilimuni imboma paa kondo kolopa, ulu teremeleanga pundu topa mindili tilka nalo we tiye koromo.

Ulu te temolo ningolio Gotenga imbi leko mi naa leangei ungumu

¹² Nanga ango kame, ulu te kumbe leko tengen mele i tepa: Mulu kombuna molo mai kombuna kape, molo mele tengen imbi leko paimbo nio ningi mi naa leangei. Ulu te temolo ninge lemo paa teangei. Ulu te naa temolo ninge lemo aku paa naa teangei. Ulu te ee ninge lemo aku teko teangei. Molo ningei wali aku teko teangei. Toya toko naa ninge lemo Gotenga kotena angilinge kinye teko kenjiringi kani mindili nangei nimbelo.

Imbo toya tolimuni ipuki tipe konge teremomu enge nimo

¹³ Enonga imbo te umbuni meremoya? Umbuni te memo lemo Gote konge tepili. Enonga imbo te

tono koromoya? Tono kolomo lemo yu kunana nimbe Gote kapi nipili. ¹⁴ Enonga imbo te kuro toromoya? Kuro tomo lemo Kraistainga talapena moromele tapu iyema waltindipelie enoni yunge ningi Gote kinye ungu ningi yu altopa manda molopili nipili ningi konge tendekolio wali Awilimunga imbi leko yunge kangina wel kandon-dangei wangei nipili ¹⁵ Aku wali waltindimbelo iyema ongolio Goteni paimbo tembalo ningi ipuki tikolio yu konge tengi kinye Awilimuni yunge kuromu pora nipili nimbelo kinye yu kelepa manda molombalo. Aku imbomu ulu keri mare temo lemo Awilimuni akuma tiye kondombalola. ¹⁶ Akumunga eno yu mele mele enonga ulu pulu keri teremelema nendo yando ningi para tikolio nendo yando Kristen angenupilinga ningi Gotendo konge tendangei. Aku tengi wali Goteni eno altoko manda molangei nimbelo. Imbo konopu tumbi nimbe pelimuni imbo tengi Gote konge tenderemo kinye yuni konge tenderemo mele paa enge nimbe imbomu paa manda lipe tapon-doromo. Akumunga aku teko Gote imbomanga ningi konge tendenge ungu pilipelie aku ulu tendembalo.

¹⁷ Gotenga profet iye Elaija yu lino none teli iyemu molorumu. Nalo yuni Gote kinye enge nimbe konge tepa, lo naa opili niwi nimu wali poinye yupokonga oli kite talo pakera lo naa orumu. ¹⁸ Altopa lo opili nimbe konge terimu wali lo kelepa omba poinyena langima altopa wendo orumu.

*Imbo te ungu paimbomu tiye kolombalo wali yu
kelko yando liengei ungumu*

19 Nanga ango kame, enonga imbo teni Gotenga ungu tukumemu tiye kolopa wendo pumbelo wali enonga imbo teni yu kelepa yando limo lemo **20** yu ulu pulu keri teli imbomu tepa kenjirimo aulkena pumbelo kinye kanopalie Gotenga ungumu pilipe yunge talapena ombo molopili nimbe lipe tapondopa yando limbelomunga ulu pulu keri teli imbo mini pali kolka aulkena wendo limbelo. Aku ulu tembalomunga Goteni ulu pulu keri paa awini tiye kolondombalo! Aku peya nio.

UNGU TUKUMEMU
The New Testament in the Imbo Ungu Language of
Papua New Guinea
Nupela Testamen long tokples Imbo Ungu long Niugini
copyright © 1997 The Bible League

Language: Imbo Ungu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files
dated 9 Oct 2020

8e236e4f-bf7f-5fe1-a0ea-4f115d5cbf7e